



«БИЗНЕСТІ ҚОРҒАУДАҒЫ ӘЛЕУЕТІМІЗ ЖОҒАРЫ»

– Мұрат Нұрәліұлы, әңгімені
кәсіпкерлік палатасының та-
рихынан бастасақ. Ол қандай
мақсатпен құрылған еді?

– Түркістан облысының Кәсіпкерлер палатасы – «Атамекен» ҚР Ұлттық кәсіпкерлер палатасының аумақтық бөлімшесі, «ҚР Ұлттық кәсіпкерлер палатасы туралы» заңға сәйкес 2013 жылғы 8 қазанда құрылған. Бизнес пен биліктің тиімді әріптестігі негізінде даму үшін қолайлы жағдайлар жасау мақсатында кәсіпкерлік субъектілерін біріктіретін коммерциялық емес өзін-өзі басқаратын ұйым. Түркістан облысының Кәсіпкерлер палатасы қызметінің негізгі бағыттарына тоқталар болсақ, оқыту, кеңес беру, кәсіпкерлерді мемлекеттік қолдау шаралары, бизнесті жүргізу, заңнамалық талаптар мен жаңалықтар және тағы да басқа талаптар туралы хабардар ету. Екіншіден, кәсіпкерлерді құқықтық қорғау, әкімшілік кедергілерді анықтау, аудандар, өңірлер, республика бойынша бизнестің өзекті мәселелерін шешу. Сонымен қатар, отандық өндірістерді дамытуға және тауарлардағы, жұмыстар мен көрсетілетін қызметтердегі қазақстандық қамту үлесін арттыруға жәрдемдесу, бизнес-жобаларды және инвестициялық жобаларды сүйемелдеу. Түркістан облысының кәсіпорындарында сұранысқа ие мамандарды кәсіби даярлауға жәрдемдесу.

– Қазіргі таңда кәсіпкерлердің құқығы қалай қорғалады?

– Бизнесі мемлекеттік қолдаудағы маңызды оқиғалардың бірі – кәсіпкерлердің құқықтарын қорғау жөніндегі уәкіл лауазымының пайда болуымен байланысты. Кәсіпкерлердің мүдделерін қорғау үшін бизнес-омбудсмен институтын нығайту қажеттілігі туындағаны туралы Мемлекет басшысының «100 нақты қадам» жоспарында айтылған болатын. Қазақстан кәсіпкерлері өз құқықтарын біледі және ешкімге өзін басынуға жол бермейді. Егер Мемлекет басшысы кәсіпкерлерге қолдау көрсетпесе, түсіністік танытпаса, онда әрине, оларға әлі күнге дейін қиын болар еді. Шынымды айтсам, посткеңестік кеңістікте бизнесті қорғау саласында бізге тең келер ешкім жоқ. Бұл тәуелсіздіктің жемісі.

(Соңы 3-бетте)

(Соңы 5-бетте)

БҮГІНГІНІҢ БАС ТАҚЫРЫБЫ

ҚАЛЫҢ ҚАЛАЙ, ҚАЗАҚ БАСЫЛЫМЫ?



Ұлттық құндылықтарды түгендеп, ұлт болашағына қатысты мәселелердің оң шешілуінде бұқаралық ақпарат құралдарының ықпалы зор. Содан болар, журналистерге қатысты қанша сын, ескертпе айтқанымен, басына іс түсіп, шарасыздықтан шаршағанда жұрт бәріміз көмекті журналистер қауымынан сұрайды. Ал сол қаламын қару еткен БАҚ өкілдерінің өз мәселесі де аз емес. Оның біразы «Қазақ» газетінің 110 жылдығына орай ұйымдастырылған басқосуда талқыға салынды.

МАСЫЛДЫҚ САНА

ГИПЕРҚАМҚОРЛЫҚҚА ҮЙРЕНГЕНДЕРДІҢ ӨМІРГЕ БЕЙІМДЕЛУІ ҚИЫН

«Асылдан асыл туады, жалқаудан масыл туады», – деген Майқы бидің сөзі бүгінгі қоғамдағы дертті дөп көрсетеді. «Еңбек етемін» деп ниеттенген кез келген азаматқа жұмыс табылады. Бірақ кей азаматтар адал жұмысты ар көріп, төсекте жатып, ішінен шыққан өз баласын өзгеге міндетсінетіні өтірік емес. Осы тұста шын мұқтаж жанның, масыл адамның пасық әрекетінің көлеңкесінде қалып кетуі де үлкен мәселе.

Мемлекет басшысы соңғы жолдауында «Еліміздің басты құндылығы – адам. Бұл – айқын нәрсе. Ұлт саулығы жақсы болса ғана, қоғам орнықты дамиды», – деуі, құр сөз емес. Бәсекеге қабілетті, экономикасы мықты дербес мемлекет қалыптастыруда әр азаматтың әрекеті елеулі рөл ойнайды.

Осы тұрасында әлеуметтанушылар «масыл» топтардың пайда болуына түрлі факторлар әсер ететінін жеткізді. Біріншісі интеллектуалды адамның әлі толық өсіп жетілмеуі. Бұл топқа бірінші ата-ана қамқорлығын қажетсінетін, әрине, балалар және сол қамқорлықтан шыға алмай қалған ересектер тобы кіреді. Яғни, отбасы, не жақындарының көмегімен ғана өмір сүріп үйреніп қалған жандар.

«Балаңды аясаң, аяма» деген халық даналығы бекер айтылмаған. Гиперқамқорлыққа әбден еті үйренген жандар, өмірге бейімде-

луі әрине қиын. Сол себепті ата-анасына не мемлекетке масыл атанады. Екінші фактор, тоталитарлық жүйе кесірі. Тәуелсіз мемлекет атанғанымызға жарты ғасыр да толмағандықтан, жүйе ауысуына кей адамдар үйренісе алмады. Кеңес одағының «патернализмі» өз ізін қалдырып кетті.

Жаңа Қазақстан еңбек етемін деген әр өренді қолдап келеді, қолдай да береді. Бірақ қолдау ғана күтіп отыру, арманы асқақ адам үшін жат қылық. Шағын және орта бизнесті дөңгелетіп алып кетуге арналған жеңілдіктер мен арнайы бағдарламалардың мүмкіндіктерін пайдаланып, жемісін жеп отырғандар аз емес.

Шектеу тек біздің өз миымызда. 20 жастағы Ермек Назеркенің өмірлік жолы бұл тоқтамға дәлел. 2 жасынан арқа бұлшықет атрофиясы диагнозы қойылып, емі жоқ ауруы үшін есепке қойылған. Талай аурухана табалдырығын



тоздырып, шипа іздеген. Бірақ сонысына қарамай еңбектен қашпай, керісінше жұмыс жасап, қаражат тауып, тәуелсіз болуға әрекет еткен. Бүгінде SMM маманы. Контент жоспар мен мәтін, сценарийді толық өзі жазып, тек түсірілім кезінде сіңлісінен көмек қолын сұрайды. Бүгінде Назерке айына 500 мыңнан жоғары табыс тауып, өз қажеттіліктерін толық жауып, жақындарын түрлі сыйлықтарымен қуантып жүр.

Тағдыр сынағын еңсеріп, алдыға жылжуға күшті қайдан аласыз деген сауалға Назерке: – «Мотивацияны өзгерткен аламын. Өткен күндерімді қазіргі сәтіммен салыстырамын.

Өліммен мың арпалысып жеңіп келем. Демек, өзге қиындықтарды да Алланың қалауымен еңсеремін. Мен үшін менің мәселелерімді біреу келіп шешіп бермейді, менің арман-мақсатым тек өзіме құнды. Әлде, қайғырып жылай бергеннен бірдеңе шыға ма? Әрине, жоқ. Өмірде көптеген кедергілер мен қиындықтар бар. Бірақ әр жолы біз салымыз суға кетіп, қолымнан ештеңе келмейді деп шағымдасақ, алға жылжуға күш пен мотивация іздемей жата берсек, мәселе шешіле ме? Өмір жалғыз, шешілмейтін проблема жоқ. Алға ұмтылу үшін сенім мен күш бар. Берілмеңіз, күшті болыңыз және өзіңізге сеніңіз. Бәрі болады, сіз тек әрекет етіңіз, – деп, жауап қатты.

Кейіпкеріміз дәрігер болуды армандаған екен. Бүгінде медицинаның дамуына байланысты, толық емделіп, аяққа тұруға мүмкіндік бар. Өзінің әлеуметтік желіде парақша ашып жүргізуінің себебін қоғамның мүмкіндігі шектеулі адамдарға мүсіркеу қарауы дұрыс еместігін, ерекше жандарда тәуелсіз өмір сүре алатынын көрсеткісі келгендігімен түсіндіреді.

Масылдық – қоғамдағы ауыр кесел. Мұқтаж болып көмек сұрасаң да кейін оның өтемі болады. Ислам дінінде де 12 мүшесі сау адамның, бір күндік ішіп-жемі бар пенденің қол жайып, қайыр сұрауы дұрыс дүние еместігі жайлы айтылады. Өзіңнен өтірік мұқтаж жан жасау адамдықтың төменгі деңгейі, қоғамдық паразитизм. Құдай басқа шын мұқтаж болатын жайтты салмасын. Әрекеттің берекеті боларын Назерке сынды қайсар жандарымыз дәлелдеп жүр. Мемлекеттің көмегі шын мұқтаж жанның қолына тисін, өтірік мұқтаждық, масылдықтың да сұрауы болатынын естен шығармай жүрейік, ағайын.

Нұрбол ЖЫЛЫС

